

Politiit inuiaqatigiinni tamat torersumiinnerannik isumannaarinerat pillugu aammalu inuit ataasiakkaat aamma inuiaqatigiinni tamat isumannaassusaannik il. il. illersuinerat pillugu, kiisalu politiit pineqaatissiissutaagallartunik atuutilersitsisinnaanerat pillugu Kalaallit Nunaannut nalunaarut (tamat torersumiinnerat pillugu nalunaarut)

Politiit atuuffiat pillugu inatsimmi, § 23 malillugu, peqqussutikkut nr. 1320, 23.september 2022-meersukkut Kalaallit Nunaannut atuutilersinneqartoq, aalajangersarneqarpoq:

Kapitali 1

Nalunaarutip atuuffia il. il.

§ 1. Nalunaarut una Kalaallit Nunaanni Politiinut atuuppoq.

Imm. 2. Justitsministeri kommuninut tamanut aamma Kalaallit Nunaata avannaarsuata kangiani aamma Tunumi Nuna Allanngutsaaliukkamut politiinut ileqqoreqqusanik aalajangersaasinnaavoq, sumiiffimmi pissutsinut immikkut ittunut tamanna naapertuuppat, tak. politiit atuuffiat pillugu inatsimmi § 24, imm. 1.

Imm. 3. Politiinut ileqqoreqqusat imm. 2-mi taaneqartut ilaannakortumik imaluunniit tamakkiisumik uani nalunaarummi malittarisassanik saneqqussisinnaanngillat.

§ 2. Allamik malittarisassaqanngippat, una nalunaarut aqqusinerni imaluunniit sumiiffinni allani, nalinginnaasumik sumiiffigineqarsinnaasuni, innuttaasut pissusilersornerannut atuuppoq. Taamaalluni nalunaarut assersuutigalugu porte-ni, tamanut sammisaqarfinni tassunga ilagitillugit taxa-t, nuannaariartarfiit tamat perusersartarfiini, innuttaasut pissusilersornerannut atuuppoq, aamma tamat sumiiffigisinnaasaat bussinullu unittarfiit kiisalu pisiniarfiit, pisiniarfissuit, pisortat allaffii ammanerisa nalaanni.

Imm. 2. Uani nalunaarummi aqqusineq imatut paasineqassaaq pisortat aqqusineq pigisaat imaluunniit inuup aqqusineq pigisaa, cykelit aqqutaat, inuit aqqutaat, illoqannginnersat, ikaartarfiit, sulluliat, pisuffiit imaluunniit assigisaat, nalinginnaasumik angalariaatsimik ataatsimik imaluunniit angalariaatsinik arlalinnik atuinikkut nalinginnaasumik angallavigineqartut.

Kapitali 2

Inuiaqatigiinni tamat torersumiinnerannik il. il. isumannaarineq

§ 3. Persuttaannerit, nillianerit, suaartarnerit imaluunniit nipiliornerit, nakuusernerit, innarliinerit imaluunniit allatut iliornerit, tamat torersuumiinnerannut akornutaasut, inerteqqutaapput.

Imm. 2. Kanngunartumik imaluunniit mamianartumik pissusilersorneq inerteqqutaavoq, allanik ajoqusiisinnaasoq imaluunniit tamanut maligassiuinerlunnerusoq.

Imm. 3. Aalakoornartunik imaluunniit allanik aanngajaarnartunik imaluunniit toquararnartunik annertuumik sunnertisimalluni, allanut akorngutaasinnaasumik, angallanneq inerteqqutaavoq.

Imm. 4. Sumiiffinni, nalinginnaasumik tamanit iserfigineqarsinnaasuni, ataavartumik tammaarfissanik pilersitsinissaq aammalu tammaarsimaarnissaq inerteqqutaavoq, qanigisaaniittunut toqqissisisimannginermik pilersitsisinnaasunik.

Imm. 5. Imm. 1-imi aamma 2-mi taaneqartutut, sumiiffinni nalinginnaasumik iserfigineqarsinnaanngitsuni, iliuuseqartoqarpat, aammalu tamanna tamat torersuumiinnerannut akornutaappat, tamatuma unitsinneqarnissaanut politiit inassuteqarsinnaapput.

§ 4. Eqiterunnerit, tamat torersuumiinnerannut akornutaasinnaasut, inerteqqutaapput.

Imm. 2. Politiit kikkulluunnulluunniit inassutinik nalunaaruteqarsinnaapput, tamat torersuumiinnerannik taamatut akornusiisinnaanerup pitsaaliornissaanut pisariaqartunik, tak. tassunga atatillugu politiit atuuffiat pillugu inatsimmi § 9.

§ 5. Aqqusinerni ingerlaaqatigiinnerit aamma ataatsimiinnerit politiinut inuttut saaffiginninnikkut nalunaarutigineqassapput, kingusinnerpaamik akunnerit 24-t pinissaat sioqqullugu. Aaqqissuisoq imaluunniit tassunga sinniisusooq nalunaaruteqartuussaaq aammalu nalunaarut ataatsimiinnerup imaluunniit ingerlaaqatigiinnerup siunertaanik, qaqugukkut pinissaanik, naapiffissap sumiinneranik aammalu ingerlaarfiusussamik kiisalu peqataasussat amerlassusissaattut naatsorsuinermik imaqassaaq.

Imm. 2. Imm. 1-imi aalajangersagaq ilisinermut atatillugu ingerlaaqatigiinnernut atuutinngilaq.

§ 6. Politiit kinaluunniit inassinnaavaat sumiiffimmi aalajangersimasumi uninngaqqunagu imaluunniit ingerlaffissami naatsumi siumut aamma utimut uteqattaqqunagu, pineqartup uninnganera imaluunniit ingerlanera eqqaani najugalinnut imaluunniit sanioqquttunut akornutaappat, imaluunniit tunngavissalimmik pasitsaanneqarpat, pineqartoq sumiiffimmi tassani pinerlulluni iliuuseqarnera.

Imm. 2. Inuup § 3, imm. 1-3 imaluunniit imm. 5 arlaleriarluni unioqqutissimappagit, politiit pineqartoq nalunaaruteqarfigisinnaavaat siumut aamma utimut uteqattaarneq imaluunniit kingullermik unioqqutitsiffiusup 100 meterinik radius-eqartup iluaniittumi sumiiffimmiinnissaq inerteqqutaasut. Inerteqquteqarnermik nalunaarutiginninnermut piumasaqaataavoq, tunngavissalimmik isumaqartoqarnissaa, pineqartup sumiiffimmi inerteqquteqarnermut ilaatinneqartumi unioqqutitseqqissinnaaneramik.

Imm. 3. Inuup § 3, imm. 4 unioqqutissimappagu, politiit pineqartoq nalunaaruteqarfigisinnaavaat unioqqutitsiffiusimasumi siumut aamma utimut uteqattaarneq imaluunniit illoqarfiup iluaniinneq

imaluunniit killilerneqarsimasumi sumiiffimmiinneq inerteqqutaasut. Inerteqquteqarnermik nalunaarutiginninnermut piumasaqaataavoq, tunngavissalimmik isumaqartoqarnissaa, pineqartup sumiiffimmi inerteqquteqarnermut ilaatinneqartussami unioqqutitseqqissinnaanera.

Imm. 4. Aqquserngit pineqartillugit imm. 2-mi aalajangersagaq assinganik atuutissaaq, imm. 1-imik arlaleriarluni uteqattaartumik pisoqarnerani atuineq eqqarsaatigalugu.

Imm. 5. Imm. 2-4 malillugit inerteqqutit allakkatigut nalunaarutigineqassapput aammalu tunngavilersorneqarsimassallutik. Inerteqqutitut piffissaliilluni aalajangersaasoqassaaq, ukiut 2-t sinnersinnaanngisaannik.

§ 7. Susassaqanngitsut majuartarfinni, porte-ni, illut isaariaanni imaluunniit illut inissialluunniit majuartarfiini, illut imaluunniit inissiat inoqanngitsut kælder-iini imaluunniit qalianni, gårde-ni, naatsiivinni imaluunniit quini, sanaartorfinni, angallassissutini, umiatsiani imaluunniit assigisaanni uninngaqqusaanngillat.

Imm. 2. Tunngavilimmik pissutissaqarani matunut imaluunniit igalaanut kasuttorneq, matut sianiinik atuineq imaluunniit assigisaanik najugaqartunut akornusersuutaasinnaasunik iliuuseqarneq inerteqqutaavoq.

§ 8. Politiit højtalere-nik, nipiluutitik, nipilersuutitik imaluunniit assigisaanik atuineq inerteqqutigisinnaavaat, atuineq eqqaani najugaqartunut imaluunniit sanioqquttunut malunnaatilimmik akornutaasutut nalilerneqarpat.

Imm. 2. Nal. 7 sioqqullugu aamma nal. 18-ip kingornatigut nioqqutissat pillugit aqqusinermi nillianeq inerteqqutaavoq aammalu ingerlanneqarsinnaanani tamanna nappasimavinnut, atuarfinnut imaluunniit assigisaanut akornutaappat.

§ 9. Plakatinik imaluunniit saqqummersitanik nivinngaassuineq imaluunniit angallassineq, assinik imaluunniit allatanik tuniniaaneq imaluunniit agguaneq inerteqqutaapput, taamaaliernerit tamat torersumiinnerannut akornutaappata, imaluunniit plakatit, allatat imaluunniit assit mamiatsannartunik imaqarpata.

Imm. 2. Illuni allatanik aamma assinik mamiatsannartunik imalinnik najugaqartuunngitsunut tunniussineq inerteqqutaavoq, paatsuugassaanngitsumik taakkuninnga imissuteqarsimanngitsunut, imarisaat allanut innarliisinnaappata imaluunniit tamanut maligassiuinerlunneruppata.

Imm.. 3. Inuussutissarsiornikkut soqutigisaqarnermut atatillugu pilerisaarutitik sanioqquttunut agguaneq inerteqqutaavoq.

§ 10. Aqqusinermiinnermi meeqqat mikisut angajoqqaanit imaluunniit allanit meeqqanik paarsisuusunit pisarialimmik nakkutigineqassapput.

§ 11. Aqqusinermi angallatinik motorilinnik imaluunniit cykelinik motorilinnik ingerlaseqartilluni qimmimik pituutalimmik ingerlaqateqarnissaaq inerteqqutaavoq.

§ 12. Aallaasinik, pisissinik, slangebøsse-nik imaluunniit assigisaanik atuineq, ikumatitanik ikitsineq, imaluunniit ujaqqanik, apummik, imermik imaluunniit allanik milloorneq inerteqqutaapput, taamaaliernerit sanioqquttunut ulorianartorsiortitsisinnaappata imaluunniit akorngutaasinnaappata.

Imm. 2. Sumiiffinni najugaqarfiusuniit 500 m tikillugu ungasitsigisumit qoorortuumik iginnissaq, timmiarsiummik, luftbøsemik allamilluunniit illuinnarsuummik iginnissaq inerteqqutaavoq.

Imm. 3. Aamma sumiiffinni najugaqarfiunngitsuni, soorlu aqqusinerni, sanaartorfinni, eqqaaveqarfinni il.il. inerteqqutaavoq imm. 1-imi sakkunik eqqaaneqartunik iginnissaq.

Imm. 4. Aallaasit sumiiffinnut imm. 2-mi 3-milu taaneqartunut appakaatinnginnermi imaarneqaaqaassapput. Sumiiffinni taaneqartuni aallaasinik imalinnik nassarluni angalaarnissaq inerteqqutaavoq.

Imm. 5. Sumiiffinni najugaqarfiusuni, imm. 2-mi aalajangersarneqaraluartoq taamaattoq eqqarluni unammisitsinerit politiit immikkut akuerisaanni piffinni pisinnaapput.

§ 13. Sulisoqartillugu sanioqquttunut ulorianartorsiortitsisinnaasumik imaluunniit akorngutaasinnaasumik, assersuutigalugu illumik iluarsaassinermut imaluunniit aserfallatsaaliinermut atatillugu, sanioqquttunut mianersoqqussutitut illersorneqarsinnaasunik assiaqutilisoqassaaq. Ikkat imaluunniit atortussat qalipanneqarsimasut panernissaat tikillugu, erseqqissumik allagartaliinikkut sanioqquttut mianersoqquneqassapput, ikkat imaluunniit atortussat qalipaqqammernerat pillugu.

Imm. 2. Qalequtissiat, aputit, kusukkat, imaluunniit assigisaat illumit nakkaasinnaanernut ulorianartoqarpat, sumiiffinni inuit angallaffigisartagaanni, tassunga ilaallutik aqquserngit, aqqusineqqat, pisuinnartunullu aqquutissiat, taava piginnittup piaarnerpaamik sanioqquttut mianersoqqussavai illersorneqarsinnaasunik assiaqutiliinikkut aammalu piaarnerpaamik isumagissallugu pisarialimmik iluarsaassinissaq imaluunniit aputaajaanissaq imaluunniit kusukkanik il. il. piiaanissaq.

Imm. 3. Inissiani atortussat imatut ilineqassanngillat imaluunniit atorneqassanngillat, uppissinnaanngortillugit imaluunniit nakkarsinnaanngortillugit aammalu taamaalillutik sanioqquttunut ulorianarsisinneqarlutik imaluunniit akornutaalerlutik. Igalaat illersorneqarsinnaasumik aalajaallisinneqarsimassapput.

Imm. 4. Politiit aamma suut sanioqquttunut ulorianartorsiortitsisut inerteqqutaalertissinnaavaat.

§ 14. Sinerissami imartat aamma tatsit uffarfittut atortakkanut suut annanniutitut inissinneqassanersut aammalu suut pineqaatissiissutit atuutilissanersut, tassunga ilagitillugu nakkutilliineq, politiit, pisariaqartitsineq naapertorlugu kommunabestyrelsimik isumaqatiginninniareernikkut, aalajangersarsinnaavaat, uffartut inuunerannut aamma peqqissusaannut ulorianartorsiortitsisinnaaneq pistaaliorniarlugu.

Imm. 2. Politiit kommunabestyrelsimik isumaqatiginninniareernikkut allagartaliinikkut imaluunniit assigisaatigut ersarisaanikkut uffarneq pillugu malittarisassanik

aalajangersaasinnaapput, tassunga ilagitillugit, sumiiffinni erseqqissumik taaneqartuni uffarnerup angalaarnerullu inerteqqutaanera pillugu malittarisassat.

Imm. 3. Politiit imm. 2-mi taaneqartutut iliuuseqarlutik, sinerissamut qanittumiittuni sumiiffinni taaneqartuni umiatsianik motor-ilinnik, vandscooterinik angallannermut aamma windsurfing-ernermut il. il. malittarisassanik aamma aalajangersaasinnaapput, taamaaliorneq imaatigut angallannermut pisariaqartutut isigineqarpat, kanngisaaruteqarneq imaluunniit akornuteqarneq pitsaaliorniarlugit, imaluunniit pisariaqanngitsumik nipiliornerit allanut akornutaasinnaasut pitsaaliorniarlugit.

Imm. 4. Politiit imm. 2-mi taaneqartutut iliuuseqarlutik, sumiiffinni aalisarnermut aamma tatsini imaluunniit assigisaani angallannermut malittarisassanik aamma aalajangersaasinnaapput.

§ 15. Politiit imaluunniit oqartussa qarfiup taassuma, politiit tamatumunnga piginnaatitaata, allagarsiinikkut imaluunniit tamanut nalunaaruteqarnikkut sinerissami, talittarfinni imaluunniit tatsini, kuunni aammalu allani imeqartuni, pisortanit isumagineqartuni sikukkut angallanneq inerteqqutigisinnaavaat.

Imm. 2. Sinerissami sikumi ammalattaliortoqartillugu siku aserorterneqartoq ammalattaliaq kaajallallugu iliorarneqassaaq. Politiit piumasarisinnaavaat ammalattaliat illersorneqarsinnaasumik ungalusimanissaat imaluunniit nalunaaqutsersimanissaat.

Imm. 3. Imeqartuni imm. 1-imi taaneqartuni politiit akuersiseqqaarnagit ammalattaliortoqarsinnaanngilaq. Sikumi ammalattaliat illersorneqarsinnaasumik ungaluutserneqassapput imaluunniit nalunaaqutserneqarlutik.

§ 16. Pisortat pigisaanni torersuunissamut aalajangersakkat pulaartunit malinneqassapput, allagarsiinikkut nalunaarutigineqarsimasut, aamma torersuunissamut aalajangersakkat malinnissaannut innersuussutit nakkutilliisunit tunniunneqartut malinneqassapput. Tamannattaq atuuppoq toersuunissamut aalajangersakkanut, allagarsiinikkut nalunaarutigineqarsimasunut, aammalu kommunalbestyrelsimiit oqaaseqaammik piniartoqareerneratigut politidirektørimiit akuerineqarsimasunut, sumiiffinnut inuit nammineq imaluunniit pisortat atugassaannut, aqqusinernut imaluunniit allanut sumiiffinnut nalinginnaasumik iserfigineqarsinnaasunut, tak. § 2.

Kapitali 3

Pineqaatissiissutaagallartut

§ 17. Politiit pineqaatissiissutaagallartunik inassutunik imaluunniit inerteqqutunik aalajangiisinnaapput, inuiaqatigiinni tamat torersumiinnerannut ulorianaatit pitsaaliorniarlugit imaluunniit inuit ataasiakkaat imaluunniit inuiaqatigiinni tamat isumannaassusaannut tamanna pisariaqartutut nalilerneqarpat.

Imm. 2. Imm. 1 malillugu inassutininik imaluunniit inerteqqutininik atuutilersitsineq politidirektør-imit imaluunniit taassuma tamatumunnga piginnaatitaanit aalajangerneqassaaq. Aalajangiineq tamanut nalunaaruteqarnikkut nalunaarutigineqassaaq aammalu tunngavilersuinerminik imaqqassalluni aammalu sumiiffik aamma piffissaq aalajangiinnermut atuuttoq taaneqassalluni.

Imm. 3. Piffissaq aalajangiinnermut atuuttoq, sapinngisamik sivikitsuussaaq aammalu qaammatit 3-t sinnersinnaanagit. Piffissaq sivitsorneqarsinnaavoq, taamaattoq annerpaamik qaammatit 3-kkaarlugit sivitsorneqarsinnaalluni. Sivitsuineq pissaaq nutaamik aalajangiinnermut, tak. imm. 2.

Kapitali 4

Pineqaatissiineq

§ 18. §§ 3-miit 13-imut aamma § 15, imm. 2-mik unioqqutitsineq, § 14 aamma § 15, imm. 1, aamma § 16 malillugit malittarisassanik atuutilersinneqarsimasunik aamma aalajangersakkanik unioqqutitsineq imaluunniit § 3, imm. 5, § 4, imm. 2, § 6, imm. 1-2, § 8, imm. 1, § 13, imm. 4, aamma § 17 malillugit atuutilersinneqarsimasunik unioqqutitsineq kiisalu inassutininik imaluunniit inerteqqutininik malinninnginneq, pinerluttulerinnerminik inatsit naapertorlugu pineqaatissiissutaasinnaapput. Pineqaatissiissummik aalajangiinnermi immikkut pingaartinneqassaaq inuiaqatigiinni tamat torersumiinnerannik aammalu inuit ataasiakkaat aamma inuiaqatigiinni tamat isumannaassusaannik isumannaarineq. § 3, imm. 1 aamma § 4, imm. 1 unioqqutinneqarpata, taava pillaatissatut aalajangiinnerminik isiginiarneqassaaq pisup nalaani imaluunniit ingerlanerani inuiaqatigiinni tamat torersumiinnerannik annertuumik akornusersuisoqarnera. 3. pkt. taamaallaat atuutinneqassaaq pineqartup siunertarippagu inuiaqatigiinni tamat torersumiinnerannik annertuumik akornusersuinissaq.

Imm. 2. § 6, imm. 3 malillugu inerteqqutininik malinninnginnerit, pinerluttulerinnerminik inatsit naapertorlugu pineqaatissiissutaassapput.

Imm. 3. Ingerlatseqatigiiffiit il. il. (inuit pisinnaatitaasut pisussaataasullu) pinerluttulerinnermi akisussaatinneqarsinnaapput pinerluttulerinnerminik inatsimmi kapitali 5-imi malittarisassat malillugit.

Kapitali 5

Atuutilerfissaa

§ 19. Nalunaarut atuutilissaaq ulloq 1. januar 2023

Imm. 2. Malittareqqusat uku atorunnaarsinneqassapput:

- 1) Kommune Kujallermin Politii malittareqqusaat 8. december 2009-meersoq
- 2) Kommuneqarfik Sermersuumi Politii malittareqqusaat 8. december 2009-meersoq
- 3) Qaasuitsup Kommuniani Politii malittareqqusaat 8. december 2009-meersoq
- 4) Qeqqata Kommuniani Politii malittareqqusaat 8. december 2009-meersoq

- 5) Avannaata Kommuniani Politiit malittareqqusaat 12. december 2017-imeersoq
- 6) Kommune Qeqertalimmi Politiit malittareqqusaat 14. december 2017-imeersoq

Justitsministeria, ulloq 19. december 2022

Peter Hummelgaard

/ Marie Green